

PRIMER CART NI BCUAA SAN PABLI LO DE BNIETY TESALÓNICA NI RELDILAAZ JESUCRIST

1 ¹ Nare Pabli, cun Silvan ne Timoteo, cacuaan cartré par laat ni reldilaazti Jesucrist láani guidx Tesalónica, laat ni nát xpiny Xtadni Dios ne Dad Jesucrist. Laadeny gunldeedeny quiat ne iguaaddeny laat guelnaldiulaaz.

² Lllilitr rdeedni gracy Dios pur iratecti, quit rianlaaztin laat iragüelte ni rnaabni lony. ³ Cad chi rnaabni lo Xtadni Dios, a dunni zonelaazni ni abaanti pur ni reldilaaztiny, a dunni zonelaazni de ni abaanti pur ni rcaazti de saat, ne a dunni zonén cuend dec guldípacti cabezti ni teru gac pur Xtadni Jesucrist. ⁴ De sanioldilaazni Jesucrist, dunni nánni dec Dios rcaazny laat ne laany bcuabeeny laat. ⁵ Te pur chi bdxuenén laat de didxzaac xte Jesucrist, gati de diidxziti bseedni laat sino que cun guelnabee xte Spíritu Sant ne pur ni nánni dec didxldí ná ni caniin laat. Laat nánti xa bdxanni chi bzuguanén laat, gubánni ziy par idxacnén laat xa ibányti.

⁶ Chiy laat ax baanti zec ni bdxanni ne zec Jesucrist, ax pur Spíritu Sant rzaclaaazti güeldilaazti ni guniin laat masqui quesentiand guelzii gudeedti. ⁷ Ziy xquel laat nát tuby ejempli par irate de ni reldilaaz Jesucrist nez Macedonia ne nez Acaya. ⁸ Pur laat briich xtiidx Jesucrist gati nez Macedonia cun nez Acayaziti sino que iranezte riatiidix xa reldilaazti Dios, axt nicli quitru xi rquiinti idxaipnideb pur laat. ⁹ Te pur lagac laadeb rueedeb diidx xa baanti recibir dunni chi biotixlon laat primer güelt, ne xa bsaanti de ni blilot ná de dios par zenuut Dios, ax guzulo cayunti sirvi lo mercap Dios ni rbeznabány. ¹⁰ Ne ziyza rueedeb diidx xa canuut gueed Jesucrist Lliin Dios desde llayabaa, laany ni gusbány Diosny lo de binguty, Jesús ni rldá dunni lo castiguroo ni teru gueed.

2 ¹ Laat nánti de sanioldilaazni Jesucrist dec blliúc ni biotixlon laat, ² masqui laat nánti dec láani guidx Filipos gudé de bniety lon ne iralote guelzii bteeddeb dunni. Per Dios bguaadny dunni valor par bdxuenén laat de didxzaac xtenny, masqui ni bdeedtisni pur de ni rdxichne dunni. ³ Te pur quit blidxtin laat cun dixú, o par idxannén laat zec ni rcaazni, o par idxanni engany laat, ⁴ sino que zec ni abcuaabee Dios dunni par idxueen de didxzaac xtenny pur ni gunány dec zelee idxanni ni ná par idxanni, ax laaniy rdxueen, gati par idxanzaactin nez lo binguichliu sino que nez lo Dios, laany ni nánny irate ni nuu láani lazdoob bniety. ⁵ Laat nánti dec quit guuti dxi nizubyaan laat parzí icaazti dunni, nicliza quit xi bcualdotin par icáan xmilti. Dios nánny dec niy ná didxldí. ⁶ Ziyza quit rldíllytin izubyaan bniety dunni, quit rldíllytin izubyaat dunni, o izubyaaza stuby de bniety dunni, masqui zec de

apóstol xte Crist ni nan rdxapnínez inabeen laat xi gónti par dunned, per quit rdxantin ziy.⁷ Laat nánti xi güen gúcni chi bzuguánén laat, zecpacza tuby nan ni quesentiand rcualo de lliinni.⁸ Ne de tant rcaazni laat gati bdxuenéztin laat xtiidx Dios sino que quit xi niunti masqui axt nietyni pur laat, pur ni quesentiand rcaazni laat.⁹ Ne laat nánti de sanioldilaazni Jesucrist dec quesentiand bdxanni pur bdxanni dziiny. Rdxí ne guxin bdxanni dziiny par quit niguun xtsiinti niacnét dunned niacni guelnabány lalzi ni bseedni laat de didxzaac xte Dios.

¹⁰ Laat ne Dios nanchuuny xa gubánni nez lot, nania, zec ni riáld, ne sin quit xi chaleeti icuaquiat dunned, laat ni reldilaazti Jesucrist.¹¹ Laat nánti xa blidxni laat, ne xa guluzaclaazni laat zec ni run tuby dad cun de lliinbi.¹² Abniin laat ibányti zec ni riáld ibány de ni a ná xpiny Dios, laany ni rbindxny laat yáldti llayabaa rut canabeeny.

¹³ Pur ningui ziyya dunned quit rdeedti rdeedni gracy Dios dec chi bindiagti de xtiidxny ni guniin laat, baanti cuendni zec xtiidx Dios ni náni gati zecziti xtiidx binguichliu. Chiy de diidxquiy cayun dziiny láani lazdot, laat ni reldilaazti Jesucrist.¹⁴ Ne laat de sanioldilaazni Jesucrist, agudeedti zectiziac ni gudeed de xpiny Dios, de bniety Judea ni reldilaaz Jesucrist. Te pur zectiziac ni agudeedti guelzii laznaa de bniety ladxti, ziyytiziac gudeedzadeb guelzii laznaa de saa bniety Israeldeb.¹⁵ Ne de bniety Israelacza, laadeb gudinxúdeb Xtadni Jesús zec ni gudinxúzadeb de profet. Chiy bdialáazadeb dunned, quit runtideb zec ni rcaaz Dios ne irazy bniety rdxichnédeb.¹⁶ Rcuadeb idxuenén de bniety ni quit ná bniety Israel xa xquel gacdeb perdón, ziy xquel lagacqui laadeb catiodeb quia de xtulddeb, ne adeb acadeed guelna xte Dios axtpacza rut nalo.

¹⁷ De sanioldilaazni Jesucrist, chi bsáanni laat tuby tiop dxi, masqui quit caguiaan laat per a dunned bionelaazni laat, quesentiand ójlapac dunned agunán laat stuby.¹⁸ Quesentiand bcaazni niotixlon laat, nare Pabli zienzi güelt bcaaza niadguíaa laat, per bcua bindxab niac ziy.

¹⁹ Per a dunned rcaazni yioptixlon laat, te pur speranz xtenni ná dec laatiy guelrzaclaaz xtenni, laatiy xtsiinni ni riechnén ibiin nez lo Xtadni Jesucrist dxi ni gueedny stuby.²⁰ Laatiy guelrzaclaaz xtenni ne ni rzubyaan dunned.

3 ¹ Pur ningui chi bzuguaan guidx Atenas aquitru bdxuelaaztin gacbeen pur laat, ax bdxanni xgab bdxanní dunzin ruy.² Chiy bxiaaldni xcumpnierni Timoteo, laab ni rac tuby de sanicadxanni xmandad Dios catiichni de didxzaac xte Jesucrist, par cuzaclaazbí laat sutipnét ni areldilaazti.³ Te par nic tubytí quit chaxaclaaz pur de guelzii ni rdeedti, laat nánti dec ziypac ná par ideedni.⁴ Chi bzuguánén laat bdixteen lot dec zienzi guelzii ideedni, ne laat nánti dec ziyguiy aguc.⁵ Pur ningui aquitru niuelaaztia, ax bxiaalda Timoteo par gacbiia xa

zenuut ni reldilaazti Jesucrist. Te pur rdxibia niun bindxbab engany laat, chiy ax aquit xi blliúti ni bdxanni pur laat.

⁶ Per anre ni abdziny Timoteo xte ni güeguaab laat, agudixteeb lon dec güenqui zenuut ni reldilaazti Jesucrist ne zec ni rcaazti de saa bnietti. Laab nab dec llillite rzaclaaazti renelaazti dunní ax quesentiand ójlapac laat xo iniát dunní, zectiziac ni rcaazzacni inián laat. ⁷ Pur ningui, de sanioldilaazni Jesucrist, masqui iralozy de trabaju ne guelzii ni cadeedni, per quesentiand rzaclaaazni bindiagni dec güenqui zenuut ni reldilaazti. ⁸ Ax anre amastecru nuzaclaaazni pur ni agucbeen dec cazutipnécti ni zenuut xnez Dad Jesucrist. ⁹ Parzi axtpacza nicli quit rdxialni xa ideedni gracy Dios pur laat, pur irate guelrzaclaaaz ni rzienni pur laat nez lo Xtadni Dios. ¹⁰ Rdxí ne guxin rguiin rnaabni lo Dios isaanny yiopguiaan laat, ax yalo iniin laat ni rieedx gacbeet xte ni reldilaazti Jesucrist.

¹¹ Xtadni Dios ne Dad Jesucrist gacnény dunní chalee yiopguiaan laat.

¹² Ne Xtadni Jesucrist gacnény laat chaza icaazrupacti de saat, icaazti irate de saa bnietti zec ni rcaazzacni laat. ¹³ Laany gacnény laat sutipti par ibiit nania, sin duld nez lo Xtadni Dios, dxi ni gueed Dad Jesucrist cun irate de xpinny.

4 ¹ Anre de sanioldilaazni Jesucrist, rguiin rnaabni lot pur Xtadni Jesucrist, dec zec ni anabányti anre, zec ni abseedni laat ibányti par gúnti zec ni rcaaz Dios, gulchaza gulgaanyrupac pur ibányti zec ni rcaazny.

² Te pur laat anánti irate ni gunabee Xtadni Jesús dunní iniin laat gúnti. ³ Ni rcaaz Dios ná dec ibányti nania nez lony, quit icaréldti ni quit illiú cun de ni quit rac chialti. ⁴ Cad tubytí gulgabee ibánnet chialti zacru zec ni rnabee Dios ne cun didxdoo, ⁵ quit gaptit chialti parzí idia gust xtenti zec ni run de ni quit rumbee Dios. ⁶ Nic tubytí quit náti par tedcat la ray cun saat, quit náti par gúnti enganybi icaréldti ni quit illiú cun chialbi. Te pur Xtadni Dios sunny castigu irate de ziy, zec ni aguniin laat, zec ni abdixteen lot. ⁷ Te pur Dios quit guridxtiny dunní gacni xpinny par ibánni rnia, sino que par ibánni nania. ⁸ Pur ningui bniety ni quit run cuend de ni aguniin laat, gati bniety guichliutiy quit cayunbi cuend sino que Diosiy quit cayuntib cuend, laany ni rguaadny Spíritu Sant xtenny iratecti.

⁹ Anre pur xa xquel icaazti de saa bnietti, quit rquiinti xi iniaa laat pur ziy. Te pur lagacqui laat abseedti pur Dios xa icaazti saa bnietti, ¹⁰ ne ziquipac cayunti par cun irate de sanioldilaazni Jesucrist nez Macedonia. Per rguiin rnaabni lot chaza icaazrupacti de saat. ¹¹ Ziyza gulgaany pur ibányti naldi, gulyiú de xmandadti, ne zec ni aguniin laat gulgaany dziiny ¹² te par ibányzaacti nez lo de ni quit rac saat ne par quit xi gunlieedxtit.

¹³ Anre de sanioldilaazni Jesucrist, quít rcaaztin ibányti sin quít gánti pur de binguty te par quít chúut nalaas zec de ni quít zenuu Crist. ¹⁴ Zec ni roldilaazni dec Jesús gutyny ne gubánny stuby, ziygacza roldilaazni dec de ni aguty ne güeldilaazdeb Jesús, ziyza sbányza Dios laadeb pur Jesús.

¹⁵ Pur ningui zec ni agucbeen pur xtiidx Jesucrist, dunní rniin laat dec irate de xpinny Crist ni nabányzic chi gueedny stuby, quít saniidytideb lo de xpinny ni aguty. ¹⁶ Te pur dxiqui zíeny rsee ni inabee xa gac, zíeny rsee ángli ni rnabee lo de ángli, zíeny icuidx trumpet xte Dios. Chiy ziat Xtadni Jesucrist xte llayabaa, ax nidoote de xpinny ni aguty ibíi ibány stuby. ¹⁷ Chiyrú de sáan ni nabányzic dxiqui idxasaan cun de bniety ni gubíi gubányqui, ax azoon yaa láani de zá rut ichalon Xtadni Jesucrist. Ziy xquel azoldeznénny par chazy. ¹⁸ Pur ningui gulduzaclaaaz de saat cun de diidxqui.

5 ¹ Anre pur xi dxi o gúcza gac ziy, quít rquiinti iniia laat de sanioldilaazni Jesucrist. ² Te pur laat nanchuut dec zecpacza ni rdziny tuby gubaan guxin, ziy xquel idziny dxi ni gueed Xtadni Jesucrist stuby. ³ Chi inii de bniety: “Güenqui zoon, xíteete gacti”, chiy chalzalodeb idziny guelzii par laadeb ni quít xo ldátideb lonii, zecpacza ni tuisqui rdziny yiuub xte tuby bniety gunaa ni aidziny lliinni guichliu. ⁴ Per laat de sanioldilaazni Jesucrist, aquítru zétit nez nacay par inaaz dxi ni gueed Xtadni Jesucrist laat zec ni rdziny tuby gubaan. ⁵ Te pur iratecti azenuut bieeny xte Dios, iratecti azenuut xnezny. Quit zonuutin nez mal, nez nacay. ⁶ Pur ningui quít náti par ibánni zec tuby ni raaisy, zec ni run iraru bniety, sino que itiíchni xcaaldni, ibánni ni nianlaaz. ⁷ De ni zenuu nez mal, zecpacza tuby ni raaisy, zecpacza tuby ni rzuz zenuudeb nez mal. ⁸ Per dunní ni azonuun bieeny xte Dios, iduibtiampé ná par ibánni ni nianlaaz. Igualon dunní cun guelreldilaaz cun guelrcaaaz xte Dios ne izutipnén ni roldilaazni dec ardxapni perdón. ⁹ Te pur Dios quít guridxtiny dunní gacni xpinny par idxáldni castigu xtenny, sino que par idxapni perdón xtenny pur Xtadni Jesucrist, ¹⁰ laany ni gutyny pur dunní te masqui nabánni o masquiza agutyni chi gueedny stuby, per zoldeznénny. ¹¹ Pur ningui gulduzaclaaaz de saat ne gulgacnésaa par chaza gacbeerut, zec ni acayunti.

¹² De sanioldilaazni Jesucrist, rguiin rnaabni lot, gulgáp didxdoo de bniety ni caseed laat xtiidx Dios, laadeb ni caliuudeb ne calidxdeb laat xa chanuut Jesucrist. ¹³ Gulgac güen cun laadeb, quesentiand gulcaazdeb pur mandad ni cayundebqui. Gulbány zacru cun de saat.

¹⁴ Ziyza rnaabni lot de sanioldilaazni Jesucrist, gul lidz de ni quít rcaaz gún dziiny, gulduzaclaaaz de ni rexaclaazné xnez Dios, ne gulgacném de ni gady gacbezaac xtiidx Dios, gulgáp pacency iratedeb.

¹⁵ Gulcualo quit gúnti mal de ni run mal laat, güenru gulgaany pur gacti güen cun de saat ne cun irate bniety.

¹⁶ Gulchuzaclaaz iduibte ni nabányti. ¹⁷ Quit cuezti inaabti lo Dios.

¹⁸ Guldeed gracy Dios pur irate, te pur ziy ná ni rdxalaazny gúnti zec xpíny Jesucrist ni nát.

¹⁹ Quit icuatit inabee Spíritu Sant laat. ²⁰ Quit gúnti despresy ni rnii de bniety ni rteed xtiidx Dios. ²¹ Gulgacbezaacllga pur xitill cos, ax gulgaany ni racbeet ná güen. ²² Gulbicá lo irlote de mal.

²³ Xtadnì Dios, laany ni rguaadny guelnaldiulaaz gacnény laat par yalo gacti nania nez lony. Chiy laany igualony laat ne spírit ne almi xtenti, par gacti nania nania dxi ni gueed Xtadnì Jesucrist. ²⁴ Ne Dios zunny ziy, te pur laany ni rbindxny dunnì gacní xpinny, rzuubpacny xtiidxny.

²⁵ De sanioldilaazni Jesucrist, gulnaab lo Dios pur dunnì.

²⁶ Gulguaapdios irate de sanioldilaazni Jesucrist cun tuby abraz.

²⁷ Ne pur Xtadnì Jesucrist, nare rniiia ne rnabiia laat: Gulguuld cartqui nez lo irate de sanioldilaazni Jesucrist.

²⁸ Xtadnì Jesucrist, laany gunldeeney quiat. Amén.